



沈文肅公政書卷四目錄

總理福建船政奏摺

船政任事日期摺

同治六年六月十七日

察看福州海口船塢大概情形摺

同治六年八月初八日

洋將到閩摺

同治六年九月初十日

洋將購器雇工詳悉情形摺

同治六年九月二十三日

船政創始需才摺

同日

李慶霖留局差遺片

同日

造船開工日期併船廠情形摺

同治七年正月初九日

據情代奏謝

恩摺

同治七年三月二十九日

沈文肅公政書卷四

目錄

一

江岸坍塌謹陳籌堵情形摺

同治七年閏四月二十五日

機器到工已齊并船廠現在情形摺

同治七年六月二十三日

暹木到工船身告成並鐵廠教造起限情形摺

同治七年十二月二日

十六日

第一號輪船下水並續辦各情形摺

同治八年五月十二日

輪船監駛八津靜候派驗摺

同治八年八月二十六日

二號輪船下水並續造情形摺

同治八年十一月十二日

船政漸著成效懇擇尤獎勵摺

同治九年二月初十日

三號輪船下水並續造情形摺

同治九年五月十四日

請簡派輪船統領摺

同治九年八月初七日



船政任事日期摺 同治十一年十二月十五日

七號八號輪船出洋並以次下水酌改船式各情摺 同治十二年正月二

年正月二  
十七日

船政經費支絀摺 同日

輪船弁兵專習槍礮片 同日

船政物料仍免納稅釐片 同日

續陳各船工程並挑驗匠徒試令自造摺 同治十二年六月二十日

統領隨時操演片 同日

續陳輪船工程並練船經歷南北洋各情形摺 同治十二年七月二

十四日

沈文肅公政書卷四

目錄

二

船工將竣謹籌善後事宜摺 同治十二年十月十八日

船政教導功成籲懇獎勵摺 同日

閩廠輪船續行興造片 同治十三年七月

擬購挖土機船鐵脅新式輪機片 同治十三年十二月初一日

船政需費萬緊海關無款可撥請撥四成洋稅摺 光緒元年六月

日

會籌船政替人候旨盤交遵赴新任摺 光緒元年八月初八日

船政需人甚急請派重臣接辦摺 光緒元年八月十八日

船政欠款節閩海補解足額以後六成洋稅先儘按月解

濟摺 光緒元年八月二十九日

報赴新任起程日期摺

光緒元年九月

日

沈文肅公政書卷四

目錄

三

沈文肅公政書卷四

總理福建船政奏摺

船政任事日期摺

同治六年六月十七日

奏為恭謝

天恩馳報任事日期兼瀝下忱仰祈

聖鑒事竊

臣於同治五

年十一月初一日奉

上諭左宗棠奏請派重臣總理船政一摺沈葆楨著總司其事並准其專摺奏事先刻木質關防印用一切應辦事宜並需用經費均著英桂吳棠徐宗幹妥為經理仍隨時與沈葆楨會商不可稍有延誤等因欽此

臣自渥荷

生成優予終制從未敢

沈文肅公政書卷四

奏摺

一

一人官署左宗棠奉命西征倉卒見訪堅以船政相屬臣知事在必行自顧材非其任面辭者四函辭者三呈辭者再且徇本籍士民之意聯名籲留左宗棠暫緩去任原以創造輪船關係至鉅非其人莫能勝也乃蒙

聖主特達之知采及菲材畀以重寄始飭會辦繼令專司且感且懼至於涕零早夜徬徨寢食幾廢誠以臣之材望迥非左宗棠之比而所處之地又各不同故也洋人之性善疑非其素所信服之人動生猜忌日意格德克碑久隸左宗棠麾下其公忠果毅親見之而習知之固宜為之盡力臣於二將無一面之識其難一也輪船經費與別項軍需不同稍不應手便礙大局從

前所估祇屬大概數月以來核計應辦工程應發款項便有從前未經議及者出款稍溢便苦不敷至於成船之後一船又有

臣

一船之經費非放開眼界通盤籌畫雖竭帑藏不足以供之以迂拙之才處桑梓嫌疑之地其難二也紳受治於官者也爲所治者忽然與之並列其勢必爭咸豐年間設團練大臣選巨紳之有厚望者爲之然獲咎者往往而有未見成功者蓋互相推諉則事不行互執己見則事又不行構隙甚微頓成冰炭雖封疆大吏均公忠體國而權勢所在媒孽者多下至胥隸皆足以簸弄是非其難三也官之於民有分以相臨故威則知懲恩則知勸紳與士民等耳不任事猶可也任事則親故滿前恩威

沈文肅公政書卷四

奏摺

二

俱窒所求不遂謗讟橫生臣自束髮受書及宦成歸里頗不見惡於鄉黨乃奉命之日薦書盈篋戶爲之穿舌做唇焦立成

怨府匿名揭帖倡自官場寢爲風俗輒思搖撼大局以快其志

於臣何所加損然而人心世道之憂也其難四也欲速則不成

惜費則不成其理顯而易見然費數百萬帑金責效於五六年之後人人以利藪相窺一處脂膏便思自潤先飽私橐貽笑遠人非以法痛繩之卽轉相仿效其難五也外國可法之事無多

而製器之工實臻神妙其人非有聰明絕異之質但此精益求精

密益加密不以見難自阻不以小得自足此意正自可師內

地工匠專以偷工減料爲能其用意卽已迴別故不患洋人教

導之不力而患內地工匠向學之不殷非峻法以驅之重賞以誘之不足以破除其相沿之陋習其難六也日意格德克碑功成之日既獲厚利又得重名名利所歸妒之者眾求分其利求毀其名皆在意料之中稍涉游移則前功盡棄左宗棠威望足以鎮之非<sub>臣</sub>之所及也其難七也具此七難何敢輕率從事惟念殷憂啟 聖時事多艱

皇太后

皇上且旰食宵衣焦勞中夜若爲臣子者狃於避謗遠罪之私智何以上答 君父而自立於天地之間是以再四躊躇欲辭不敢計惟有毀譽聽之人禍福聽之天竭盡愚誠冀報 高厚

沈文肅公政書卷四

奏摺

三

鴻慈於萬一<sub>臣</sub>所深恃者

諭旨諄切知自強之道斷自 宸衷以萬不得已之苦心創百世利賴之盛舉必不爲浮說所搖但願共事者體 朝廷之心以爲心勿以事屬創行而生畏難之見勿以議非已出而在隔膜之思則大功之成拭目可俟矣船廠根本在於學堂<sub>臣</sub>訪聞所派教習咸能認真講授生徒英敏動慎者亦多其頑梗鈍拙者隨時去之有蒸蒸日上之勢惟馬尾船廠洋樓一切工程去城較遠監工員紳呼應不靈匠役不無延緩<sub>臣</sub>函囑前署藩司船政提調周開錫先行親赴工所催督一次現在工程亦漸有端緒可以無誤事機周開錫一腔血誠不避嫌怨視公事如家

事爲船政中必不可少之人現在病已就痊與臣常川住局可  
以隨時相與講明而切究之間日意格已將機器購齊料理下  
船約計七月閒可到福建候補道船政提調胡光墉將左宗棠  
餉事安置妥帖亦可來閩臣於本月十六日釋服十七日往晤  
福州將軍臣英桂閩浙總督臣吳棠福建巡撫臣李福泰後卽  
駕輪船駛至馬尾工次恭設香案望闕叩謝

天恩敬謹任事遵

旨刊刻木質關防文曰總理船政關防卽日開用一切辦理情  
形容俟詳細察核會商隨時奏請聖裁所有任事日期並感  
懼下忱理合先行由驛馳陳伏乞

沈文肅公政書卷四

奏摺

四

皇太后

皇上聖鑒訓示謹奏



察看福州海口船塢大概情形摺 同治六年八月初八日

奏爲察看福州海口及船塢大概情形恭摺具陳仰祈 聖鑒

事竊 臣於六月十七日馳赴馬尾蒞事業經奏明在案隨接見

在事員紳咨詢一切並駕輪船周覽上下形勢知馬尾一區上

抵省垣南臺水程四十里下抵五虎門海口水程八十里有奇

自五虎門而上黃埔壺江雙龜金牌館頭亭頭閩安皆形勢之

區而金牌爲最要自閩安而上洋嶼羅星塔烏龍江林浦皆形

勢之區而羅星塔爲最要馬尾地隸閩縣踞羅星塔之上流三

江交匯中間港汊旁通長樂福連江等縣重山環抱層層鎖

鑰當候潮盛漲海門以上島嶼皆浮潮歸而後洲渚礁沙縈迴

沈文肅公政書卷四

奏摺

五

畢露所以數十年來外國輪船夾板船常泊海口非土人及久

住口岸之洋人引港不能自達省城道光末年地方大吏籌備

海防但載石鑿舟以塞林浦上流竟割重重天險而棄之 臣詢

之海濱土人至今猶共以爲非策也船塢在馬尾山麓地曰中

岐但就其一方地勢而言大江在前迤南而下羣峯西拱狀若

匡牀中間坦處舊本村田去年購買歸官始圈爲船塢計地周

圍四百五十丈有奇客冬以來招集民夫隗者平之低者壘之

慮田土之積弱難勝也沿隄密釘木椿以固之慮海潮溪汎之

不時驟至也沿隄各增五尺以防之隄外三面環以深濠既藉

通運載之船亦可瀉積淤之水隄內濱江者爲船槽若鐵廠輪

廠機器之廠斫木之廠架木之棧房皆參列其後餘尚有從前未經商定之件宜俟洋將到閩續行分別籌商措置閩外之東地北爲臣及辦事各員紳公所外國匠房三十間周以甃垣如鱗之次外國匠房之左爲法國學堂後綴生徒下處三十間其制略如匠房之式又左爲英國學堂其生徒下處同之下近江滸則煤廠在焉上倚山麓則中國匠房在焉循麓再上山之左肋可以眺遠臣飭前駐楚軍五百人因地築壘不特可攬船廠全局沿江上下數十里風帆沙鳥如在几前稍下則監督日意格所居也在臣公所之右者有外國醫生寓樓匠首富樓其與日意格山樓對峙者則副監督德克碑之屋下爲官道將

沈文肅公政書卷四

奏摺

六

抵江岸劃爲官街以便民間貿易一切土木或已經完工或已有三四分至八九分不等辰下春鍤雨集斤斧雲從計日課功屈指可數此船塢內外之大概情形也臣又維船政根本在於學堂因於六月十九日就馬尾甄別法學藝童隨及其學藝童既因其勤惰分別升降復定章程每日常課外令讀

聖諭廣訓孝經兼習論策以明義理其續招入局者先扁門考校擇其文理明通尤擇其姿質純厚者以待敘補蓋欲習技藝不能不藉聰明之士而天下往往愚魯者尙循規矩聰明之士非範以中正必易入奇衰今日之事以中國之心思通外國之技巧可也以外國之習氣變中國之性情不可也且浮澆險薄

之子必無持久之功。他日於天文算法等事。安能精益求精。益求密。謹始慎微之方。所以不能不講也。採辦一節。似易實難。不患美材之難求。而患人心之苟且。向來官場氣習。以浮冒搪塞爲能。船政之興。尤視爲利藪。去年以來。承辦銅鐵木料煤炭者。非無其人。然用商賈。有時擾累之弊。甚於官司。用官司。有時侵漁之端。甚於商賈。馴至劣幕奸胥。交通市儈。鬼蜮叢生。是以民閒置貨。尙有精良。一屬公家。便多贗鼎。明知國帑之當重。竟敢於糜國帑。明知要工之不可誤。竟敢於誤要工。言之實堪痛恨。臣邇又聞向來外國船材煤炭多運自緬甸。暹羅現雖遣員先於近處採採搜巖。他日恐仍不免取材荒裔。重洋遼迴。更防

沈文肅公政書卷四

奏摺

七

不勝防。任非其人。糜費雖多。仍歸無用。擬乘此發令之初。明罰勅法。以警其餘。人心畏法。而後弊竇可除。良材畢至也。至船廠之興。固須收羅工匠。輪船下水。則舵工水勇。缺一不可。不行非徒習慣風濤。尤須熟精槍礮。蓋國家之創造輪船。譬諸千金買駿。倘衝鋒陷陣。不持寸鐵。雖有千里之馬。安足成功。現在洋匠尙未至。閩船成尙需時。日擬先調閩中舊礮船十隻。添練水勇二三百名。未成船以前。藉以巡緝近洋。成船以後。即可環甲登舟。駕輕就熟。此臣近日考校學堂分飭採辦及招募水勇之情形也。至製造工程。俟日意格等分載工匠。輪機到廠後。再行具奏。除繪圖咨呈軍機處總理衙門外。理合先將大概情形。謹會

同一等恪靖伯陝甘總督臣左宗棠福州將軍臣英桂閩浙總督臣吳棠福建巡撫臣李福泰恭摺由驛具奏以聞伏乞  
皇太后

皇上聖鑒訓示遵行謹奏

沈文肅公政書卷四

奏摺

八

洋將到閩摺 同治六年九月初十日

奏爲洋將到閩恭摺馳陳仰祈 聖鑒事竊臣於本年八月初八日業將船隔大概情形奏明在案茲九月初九日洋將日意格帶同洋員洋匠十二人女眷四口幼孩一口乘輪船駛至馬尾其機器各件據稱兩月一起分作三起由夾板船裝運來閩以後陸續可到至所有船槽鐵廠一應如何興造之處俟其詳晰具稟再行隨時奏聞理合先將洋將到閩日期會同一等恪靖伯陝甘總督臣左宗棠福州將軍署閩浙總督臣英桂閩浙總督臣吳棠福建巡撫臣李福泰合詞恭摺由驛四百里具奏伏乞

沈文肅公政書卷四

奏摺

九

皇太后

皇上聖鑒訓示謹奏

洋將購器雇工詳悉情形摺

同治六年九月二十三日

奏爲謹將洋將購器雇工詳悉情形恭摺仰祈

聖鑒事竊臣

於九月初十日業將洋將日意格到閩日期奏明在案茲據日意格稟稱該洋將去年十一月二十二日由香港西旋十二月二十七日抵國卽日向該國水師兵部尙書稟明中國委造輪船情由該尙書以未奉 天朝

諭旨令該洋將暫緩雇工一面行文該國留駐香港之水師提督確查五月初四日該提督覆稱此事已奉

俞旨並 簡派大臣督辦且以該洋將並德克碑等効勞中國有年此次勅造輪船尤裨實用等語該國尙書乃許雇定工匠

沈文肅公政書卷四

奏摺

十

七月二十日該洋將卽乘輪船起程九月初九日抵福州馬尾前約往返以六箇月爲期現逾原限實因輾轉行查所致並非無故稽延至原約採辦各廠器具及輪機洋鐵等項共重九百八十七噸今多備一千餘噸所有價銀以及包紮保險尙屬敷用惟水脚不敷船中所用星宿盤量天尺水氣表之類亦已購齊該洋將先於六月十四日派夾板船一號由該國載船廠器具並鐵二百五十餘噸八月十八日又派夾板船一號載鐵廠一半器具並鐵二百餘噸十月初又派夾板船一號載鐵廠一半器具並輪機兩副尙有輪機兩副十二月初亦可開船惟夾板之捷不及輪船每次約須五箇月爲期鐵船槽長三十丈闊

十五丈可以進修二千五百噸之輪船工匠原約共三十七人  
現由該洋將帶來匠首五匠人七另有醫官一總監工一看鐵  
監工一駕船教習一下月可到餘則皆於明年正月由德克碑  
帶來又稱本年六月二十四日經該國主傳詢中國造船情形  
諭令用心辦理旋飭該國各部分文留駐香港之水師提督隨  
事照料各等情據此臣維該洋將此次遠涉數萬里風濤購器  
募工均已就緒現在征衣甫卸卽躬督中外工匠日在船塢將  
應辦工程妥速布置一面趕造船身以便輪機到時卽可配製  
洵屬踴躍從公深堪嘉尚除將日意格原稟抄呈軍機處總理  
衙門備查外謹將所有購器雇工詳悉情形會同一等恪靖伯  
沈文肅公政書卷四

奏摺

十一

陝甘總督臣左宗棠福州將軍署閩浙總督臣英桂閩浙總督  
臣吳棠福建巡撫臣李福泰合詞由驛四百里具奏伏乞  
皇太后

皇上聖鑒訓示遵行謹奏

奏爲船政創始在在需才宜固人心以全大局恭摺瀝陳仰祈  
聖鑒事竊惟爲政在人古有明訓事關創始尤藉羣策羣力以  
相與有成况驚鈍如臣若非廣益集思何以上承 朝廷付畀  
之重前者渥荷

天恩以署藩司周開錫補用道胡光墉交臣差遣良以周開錫  
器局宏敞志慮忠純且藩司爲度支總匯衙門呼應較捷胡光  
墉素爲洋人所信才具優長內外兼資俾臣得所藉手是以左  
宗棠與臣會商派周開錫胡光墉爲提調又奏請以廣東補用  
道葉文瀾等一併交臣差遣得

沈文肅公政書卷四

奏摺

十二

旨允行知 朝廷所以爲船政謀者至深且遠臣方幸協刀同  
心衆擎易舉乃督臣吳棠到後晤將軍臣英桂卽有船政未必  
成雖成亦何益之語嘗以總理衙門公信示臣謂臣曰此慮我  
等用錢失當也臣逐加披閱只囑將所辦情形隨時函致並無  
涉及惜費一語臣知督臣胸有成見然尙冀各行其是彼此兩  
不相妨詎意周開錫爲匿名揭帖所牽涉者督臣吳棠明知其  
誣以業經病痊之員諭令續假另委藩司葉文瀾爲訟棍陳永  
祿所翻控督臣吳棠明知其誣以業經咨結之案任聽狡展致  
滋拖累周開錫爲各員領袖且甚有功於閩省葉文瀾亦於諸  
紳中工程較熟官職較崇當局者先懷潔身之思共事者遂有



波及之懼胡光墉在浙堅辭提調屢展行期難保非以憂讒畏  
譏之情致有觀望徘徊之意伏維 國家之任事以人人之慮  
事以心若人人自危將事事皆廢

聖主至誠所感洋將効順日意格自入聞以來殫精竭思孜孜  
焉如治其家事如能和衷共濟臣當決其有成倘人各有心不  
特事廢半途抑將爲遠人所笑且船政之設雖由總理衙門王  
大臣及左宗棠奏請而自強之道實斷自 宸衷爲臣子者宜  
何如激發天良以副 宵旰勤求之望臣官非言責分屬部民  
苟非船政所關雖桑梓情殷斷不敢妄參末議至船政係臣專  
責死生以之與其終誤 國家百身莫贖何如傾竭愚懇以自

沈文肅公政書卷四

奏摺

十三

鳴於 君父之前合無仰懇

天恩諄諭周開錫終始其事專意從公毋畏浮言輒萌退志

飭督撫臣將葉文瀾被控之案秉公斷結並 飭下浙江巡撫

催胡光墉卽日前來俾臣獲收指臂之助不勝急切待命之至

伏乞

皇太后

皇上聖鑒訓示遵行謹奏

再伏讀本年八月二十日

上諭吳棠奏甄別知府請旨革職等語延平府知府李慶霖著名巧猾專事趨承著卽行革職勒令回籍等因欽此是時李慶霖正隨臣課督廠工欽奉前因理應飭卽交卸經手事件以便具報起程俾免逗遛之咎惟閱原參摺內稱李慶霖到任未久卽夤緣爲通商局員又兼爲船政局員督臣所謂趨承者當卽指此查李慶霖以咸豐年開入通商局至今已十有餘年自船政議興左宗棠以其熟悉洋情委辦購地設廠等事去年十二月部咨飭赴延平府新任復經兼署督臣英桂護撫臣周開錫

沈文肅公政書卷四

奏摺

十四

以通商船政均極緊要接辦乏人會商奏調來省是其入局之始皆在延平府未到任以前此後則爲地擇人藉資熟手何得以奏調有案責其夤緣縱使李慶霖極善趨承豈左宗棠英桂周開錫等均甘受其籠絡且延平府地方安靜通商局事事掣肘均在聖明洞鑒之中豈善於趨承者轉舍所甘而就所苦又原摺內稱其在船政局則向督臣言該局紳董主持委員無權又言洋人日意格不知何日能來督臣所謂巧猾者當卽指此查臣原係本省紳士船政爲臣專責臣自當一力主持至日

意格之來本難定期縱有此言亦非取巧乃臣面詰李慶霖則據稱謁撫臣時曾問及船政謹陳大概情形至謁督臣時從未

垂詢何由妄對臣未任船政以前與李慶霖向無一面之識其

先後入局則左宗棠英桂周開錫所委臣無所用其迴護地方

官之賢否非臣所能周知封疆大吏之黜陟尤非臣所得干預

督臣勒令回籍之請原以預杜留局之階臣且自處危疑何敢

更存偏袒惟船政濟否關係匪輕人無卻顧之心而後事有告

成之日李慶霖在局襄辦已閱年餘勞瘁不辭並無劣蹟若聽

其負屈以去此後何以用人臣願惜身家坐視事之頽廢不特

終蹈罪戾卽此心何以上對臣朝廷合無仰懇

天恩俯念船政需人准將李慶霖留局差遣如能著有成效由

臣奏請開復倘始勤終怠卽當奏請加等治罪斷不敢稍事優

沈文肅公政書卷四

奏摺

十五

容是否有當理合附片陳明伏乞

皇太后

皇上聖鑒訓示謹奏

奏爲報明造船開工日期併將船廠一切情形恭摺具陳仰祈  
聖鑒事竊臣於同治六年九月二十三日業將洋將購器雇工  
到閩詳悉情形奏明在案十月十二日總監工達士博鐵山煤  
山監工都逢英文教習嘉樂爾醫官尉達樂等到臣隨時犒勞  
安置該洋員等靡不感戴 皇仁臣一面與日意格熟籌應辦  
事宜並飭各員紳鳩工庀材務期妥速以便開工日意格先令  
木匠將從前所蓋棧房按段編門平鋪地板令畫匠繪一百五  
十匹馬力船式於地板之上分行布線細如繭絲凡船身所有  
鬪筭銜接處莫不有圖各不相混曲直尺寸誌以洋字令中國

沈文肅公政書卷四

奏摺

十六

木匠一一辨識俾按圖仿造可以不煩言而解又於船鴨之右  
臨江口岸創造船臺其造之之法先用木樁長二三丈餘者以  
雲梯懸七百斤鐵椎數十人挽繩擊下之與地平而止星羅碁  
布以固其基復將大木縱橫壓於木樁之上以取其平乃鱗疊  
巨材鈐以長四尺方圍四寸之鐵釘使黏合無間其底寬一丈  
五尺以次遞銳及其巔僅五尺厚一尺三四寸不等正視之若  
堵牆旁視之如累塔是爲一疊自外而內以次漸高凡爲疊五  
十有五前疊高一尺六寸五分積至末疊則一丈六尺五寸將  
來船成入水順推而下勢若建瓴可不重煩人力每疊相去三  
尺有奇統計全臺長二十有四丈自江中遙望之若岡巒地邈

而來中開貫以巨梁支側柱無數使互相撐柱深固不搖然後可鋪板其巔以造船底自去年九月中旬而後匠作百餘人斧斤無閒至十二月初五日第一座船臺始竣其餘三座今年秋冬當陸續告成然而船之所可貴者在機械之所從出者在廠鐵廠關係既重工費益繁方日意格之未來也其監工俄羅斯人貝錦達壘土於陽之中央形如半月議以船臺鐵廠參列其中嗣達士博以火患難防宜離不宜合於是復召工填土期於一律坦平劃前右方百餘丈之地爲船臺四劃後左方百餘丈之地爲鐵廠五其一曰鐵廠其二曰水缸廠其三曰打鐵廠其四曰鑄鐵廠其五曰合攏鐵器廠廠界既定乃於壘牆之地各

開溝徑二十丈廣六尺深五尺恐其積水難消也每溝之旁各開一井以洩之溝底編釘巨椿留徑尺出地面填以碎石擣之成屑使與椿齊其上築以石灰再聯壘方石交互鈐束以爲基址然後可施甄巖梁柱天寒霜肅眾杵爭鳴邪許之聲聞於數里此未造船以前勑立船臺並量度鐵廠基址之情形也去年十一月十八日頭起夾板船運火鋸鑽鐵機劈鐵機礪輪洋秤等物並大小鐵片鐵條二百五十餘噸到船高器重數百人運二十餘日始畢有一器以五十餘人昇之而揮汗如雨者所購木料除暹羅以急於運米無船可裝外餘則花旗木及香港所購之暹羅木先後附舶而來雖輪機未齊而船臺已成船材漸

集可造船身遂擇於十二月二十四日親率在事員紳並日意格達士博等祭告 天后出赴船塢偕提調官周開錫夏獻綸與諸員匠共捧龍骨安上船臺又到鐵廠親自拽繩下石均奠以牲醴以昭慎重禮畢召中外員匠敬宣

皇上德意勗以匪勉圖功我 國家懋賞懋官有逾常格聞者皆歡聲雷動手舞足蹈出自至情臣借提調官舉爵挈觴勞之以酒而退此當日船身開工並鐵廠經始之情形也日意格以造船之樞紐不在運鑿揮椎而在畫圖定式非心通其理所學仍屬皮毛中國匠人多目不知書且各事其事恐他日船成未必能悉全船之竅要故特開畫館二處擇聰穎少年通繪事者

沈文肅公政書卷四

奏摺

十八

教之一學船圖一學機器圖庶久久貫通不至逐末遺本又以船臺船身所需鐵葉釘鑲甚夥萬難待鐵廠之成不得不先蓋兩區俾隨時打造於是有小鐵廠之設春閏多雨恐停工廢日不得不先事圖維於是有近船臺搭蓋板棚之舉擣和石灰錘鑿石版恐其散漫無稽致滋偷惰於是有近外國棧房搭蓋板棚之舉此隨時相機酌量辦理之情形也臣維輪船之制雖屬奇制而詳察洋匠所造綦綦皆依准繩苟竭中國之聰明諒不難於取法惟是工煩費重厥有數難海濱土狹水寬列數千萬斤之機器於一隅已不勝爲患若機器一動颶馳霆擊尤虞內重外輕必周圍累巨石爲隄方臻鞏固而各廠急需之石

招匠廣採方日不暇給石隄所需更難計數不得不俟諸春末  
夏初去年十二月二十五日以風怒潮激衝齧隄根致崩坍十  
數丈牽倒棧房五分之一。聲震如雷現搶護之以巨椿大局尙  
無妨礙然一勞永逸則石隄終非可緩之圖而石匠往往居奇  
冀徼高價縱之則玩急之則逃不得不略示羈縻爲招徠地步  
此需石之難也。鐵廠初基取材最鉅尙有柁廠模廠纜廠等十  
餘處梁棟大必數圍近水之區萬難中選深巖邃谷輦致一枝  
費既不貲動淹旬月取之立竭而待之甚殷此需木之難也。廠  
地本屬村田恆虞水潦每有營造必增土五尺方樹屋基而所  
填之土稍乾則尺寸頓減須添填兩三次乃得其平以錢購土  
竟至十數里內無可購者此需土之難也。中外工匠言語未通  
目攝手畫事多隔閡稍習其言語者又染於積習輒思因緣爲  
奸且藉以陵其僇伍外國匠人以精勤自喜彼則以偷減爲能  
巡察稍疏作輟任意督責少過怨謗叢生此需匠之難也。要工  
所係臣不敢浪費以糜帑金亦何敢惜費以誤大局不敢作威  
以失衆望亦何敢姑息以媚俗情所幸我

皇上至誠格

天自去年九月以來雨少晴多既無損於農田

而趨事赴功得以日新月異日意格達士博實心實力事事務  
求精詳又執法嚴明絕不徇庇其下如監工具錦達辦事遲緩

近首布愛德負氣陵人皆立與驅斥所以洋員洋匠咸恪遵約

東盡心教導不致滋生事端在事員紳仰體 宵旰之勤沐雨  
櫛風昕宵匪閒 天心若此人心若此庶幾可望有成謹將造  
船興工日期並一切情形會同一等恪靖伯陝甘總督臣左宗  
棠福州將軍署閩浙總督臣英桂閩浙總督臣吳棠福建巡撫  
臣李福泰合詞由驛四百里具奏伏乞

皇太后

皇上聖鑒訓示遵行謹奏

沈文肅公政書卷四

奏摺

二十



據情代奏謝

恩摺

同治七年三月二十九日

奏爲據情代奏恭謝

天恩仰祈

聖鑒事竊

臣據船政正監督日意格稟稱比奉恭

錄

諭旨行知謹悉同治七年二月初二日奉

上諭沈葆楨另片奏請將洋將獎勵等語日意格等自應量予恩施正監督日意格著賞加提督銜並賞戴花翎副監督德克碑著賞戴花翎總監工達士博著賞加三品銜等因欽此欽遵跪誦之下感激難名竊維外裔未員馳驅中土戎行幸厠天寵躬膺獎功叨金珮之頒作鎮許銅符之授每撫衷而負

沈文肅公政書卷四

奏摺

二十一

疚思奮力以趨公邇因船政開工海墻興役重膺委任方慚作楫非材幸與經營竊喜運斤有藉三年趼踵兩度滄溟度地甫竣募工畢集數月以來規模粗具方將慎之又慎精益求精用壯橫海之威永廣梯航之利迺微勞纔効溫旨旋頒旣畀崇銜復加翠節德克碑泰西採幹同承寵錫彰纓達士博末技襄勞亦荷榮加新秩九重異數四海稱榮頂踵捐糜詎足報稱惟有勉鞭駑鈍力效奔馳俾鉅工早蒞利涉同歡以上副聖朝開物成務之至意所有感激下忱謹懇代奏前來

臣勵其益加奮勉以迓逾格恩施合將日意格等感激下忱

謹會同一等恪靖伯陝甘總督臣左宗棠福州將軍兼署閩浙

總督臣英桂調任廣東巡撫福建巡撫臣李福泰合詞恭摺代  
奏伏乞

皇太后

皇上聖鑒謹奏

沈文肅公政書卷四

奏摺

二十二

皇太后

奏摺

沈文肅公政書卷四

江岸坍塌謹陳籌堵情形摺同治七年閏四月二十五日

奏爲江岸坍塌逼近船臺謹陳籌堵情形並請

旨將臣交部嚴加議處恭摺仰祈 聖鑒事竊臣於本年三月

二十九日業將德克碑到工及船廠現在情形奏明在案入夏

以來雨水漸晴方督中外匠作趕造船身以待機器一面建銅

鐵各廠詎閏月十九日海潮初落西南風驟來逆浪旁衝深齧

岸址二更以後船臺前右橫四丈直十丈之江岸塌入水中

臣率在事員紳夫役人等馳赴搶護奈水勢迅急上實下虛遠

者已臥波心近者土紋水裂雖沿江一帶前已遍釘巨樁而根

柢受傷樁亦隨流而靡百端設法補救無從只得將岸傍堆積

沈文肅公政書卷四

奏摺

二十三

羣材拖運中間以防漂溺船臺本近水濱岸址愈低潮痕漸及

因於船臺前添釘巨樁三層以禦目前之急大局尙無妨礙然

土性既爲水所剋土日剋則水日驕欲固土必先敵水臣前此

卽思沿江盡砌石岸以敵洪濤因工繁費鉅需石甚夥非曠日

持久不能成功且恐岸址未堅驟加石隄不免下輕上重是以

姑俟緩圖今受病既深則病源不可不塞蓋船塢地本洲田港

汊糾紛窪處皆爛泥所積去歲填平浦激又於平地增高五尺

望之坦然而客土與原土燥溼不相能非多歷歲時未能黏合

無閒邇來每有營造患土力之不勝則密釘巨樁以實之釘樁

之地實而旁土爲樁所逼雖日溢一黍無迹可見而外既無所

鈴東內逼則外傾前者全隄環以深濠可通潮洑爲便於運致材木然土性必乾而始凝置土水中水愈通土將愈弱此病源之在內者也隄之上流五里地名下洲角十數年前水心漲一沙洲下接中岐江分爲兩江水爲洲頭所激橫出東西然後折而南下東出者遂以隄口爲衝途兼以今春洲尾之在中岐者沙痕漸長彼羸則此紕隄前港底愈深衝流愈迅臣與日意格及諸員紳乘小舟從上流詳察水勢試以木屑數十石傾入水中木屑逐水斜行恰抵隄岸而止當是時也潮迴風定波浪無聲衝激之狀猶灼然可見倘夏秋之開海颶一作驚濤怒雨傾江倒海而來撮壤懸流愈不相敵此病源之在外者也夫內外

沈文肅公政書卷四

奏摺

二十四

之病源如此非石岸必不爲功然非先導水勢使之旁流石與水已相搏其開岸亦不能遽就臣愧憤之下博訪周諮咸謂上流當衝之處宜以數巨艦滿載大石鑿沈水中以殺其怒再廣伐竹箭斜插淺流處所順迴瀾之勢引之西行隄不當衝江流自緩然後依勢築捍水短壩於外更緊靠江岸樹椿爲幹壘石爲隄以垂久遠斯外患可平依山另開數小溝以洩諸路內積之水將環隄長濠一律填塞不致往來潮洑漸漬四旁遲之又久土性乾凝而後內患可息臣曩者亦慮水勢西趨則隄前淤塞不便舟行長濠既填則盤運路遠既而思之隄外之水併力而西對岸之沙洲必日侵日削輪船仍可暢行不過船臺去水

稍遙成船之時下水多費人力嗚內之長濠盡塞不過小舟不能出入多人夫然地基鞏固較之日惴惴焉以橫決爲憂者相去懸絕兩害相形則取其輕此臣籌堵內外之大概也惟是臣躬膺鉅任不能先事豫防咎無可諉合無仰懇

天恩將臣交部嚴加議處以爲不愼所事者戒謹將籌堵情形

由驛四百里馳奏伏乞

皇太后

皇上訓示遵行不勝戰慄屏營之至謹奏

沈文肅公政書卷四

奏摺

二十五

機器到工已齊并船廠現在情形摺同治七年六月二十三日

奏爲機器到工已齊并將船廠現在情形恭摺具陳仰祈 聖鑒事竊臣於本年正月初五日業將洋將日意格等所購第一起機器到工奏明在案四月十六日復由外國馬梨阿勒各三丁船運到第二起機器其中最鉅者爲鐵廠水筒三口每口各廣數十圍高近一尋輪船之水缸次之餘爲鐵廠一半器具殊形詭狀非安頓如法關捩咸張無從稱名指類當時分派員紳督率人夫移頓二十餘日之久始獲竣事五月十九日第三起機器復由外國夾板船運到船名曰法彼爾士較第一二起之船大倍之據日意格稱中所載除鐵條七千四百二十九條鐵

沈文肅公政書卷四

奏摺

二十六

片鐵釘大礮洋灰等項數百件不計外凡爲機器者五百六十有三最重者二萬餘觔餘或萬餘觔七八千觔三四千觔不等自五月末旬之初勇丁數百人揮汗炎風烈日之中併力搬運及今一月尙未蒞事六月十七日第四起機器復到船名曰汪德乃木所載皆輪船機器計重百有二萬四千八百觔計件三萬五千有奇當令拋泊江中先將稍輕者用兵船剝載入廠其餘重大者俟第三起搬竣再行部署而當時羅列岸旁分頭起運者則有曰安迷喇係運花旗木板之船有曰悅諾花思得係運喰叻長短雜木之船有曰西洞係運船槽木料之船外尙有臺灣運木運燥之船廈門運甄之船附近運沙運石運土之民

船分載竹梢捕護江岸之小船搬移杉木儲蓋各廠之排船而木簾小刳不與焉沿江埠頭星羅碁布無隙可容故日役于夫難以剋期告畢論閩省夏秋之間颶颺常作機器重船皆涉數萬里而來倘因風浪疏虞停工待器勢必遷延時日今各起陸續到齊但費安置之力大廠一成便可專心製造故中外員匠咸鼓舞赴功以爲鉅工之成愈有把握也船塢地基舊坍之處臣恐其復有橫決自閏月末旬之初卽派弁入山採伐竹箭數萬分捕沿江淺流處所從前潮汐爲西南風所激洶湧颶前者現十減其四五上流衝口前擬巨艦載石沈之水中無如旋渦屈注萬馬奔馳千石之舟無從下旋現於水中樹木爲柵壘石

沈文肅公政書卷四

奏摺

二十七

爲壩力遏怒流因江底向多爛泥泥弱石強須漸實漸加一時未能遽就環隴長濠當一律盡填惟左近一帶工作繁興需土匪易而小溝未開倘遇陰雨無從疏洩因於左側濠口當衝之處先封塞以杜近患再行施工現在急流漸緩果經秋颶安堵如故潮頭盡折而西以後水落霜寒石塘方可興役此船塢地基之情形也船廠以內已成者曰轉鋸廠安十五匹馬力水缸於中中爲鋸輪者三一曰大直鋸一曰小直鋸一曰圓鋸外爲礪輪者一爲鑽機者一爲車牀者一爲鉗牀者三十有五缸中湯氣既升大小鐵輪互相牽引各機一時並發雷動颶馳除零星鉗鑿鑪削不計外尚有重機未曾排比妥帖者難以枚舉四

起機器既齊從前房屋不足容之復搭瓦房三十餘間曰大機器之所輪船水缸凹凸累砌高若重樓關竅相通盈千累百其已成者自外洋轉運皆拆解而來入廠後必費數月釘鈐紐合之工方可適用因於製作之處建瓦亭一區名曰水缸之廠外國鑄器皆先有鐵模始必刻木爲範不溢累黍後乃搗炭和沙與土卽其空隙填之脫胎而出再灌鐵汁其閒鐵模乃就刻模者以遲而成功鑄模者以速而見效遲速既殊不得淆雜於是分建三區一曰木模之廠一曰鑄鐵之廠風雨鍼寒暑表皆輪船必需其製法則鈎心鬪角其器具或牛毛繭絲當其游思無閒炫於日光則呂神散有所隔礙則目力窮其造作之所塞向

沈文肅公政書卷四

奏摺

二十八

開牖陰陽向背調度必有洋人辰下業已完工可以董率匠徒排列鏤刻因名之曰鐘表之廠西人錐鐵小者需人力大者賴懸機懸機之器或隆然而高或呀然而深重皆數千觔森挺槎枒目前大廠未成已須工作非夏屋不能容於是復有暫搭之錐鐵廠其與鐵廠隣者曰銅廠地雖稍狹制亦如之鐵銅水缸等廠鑄鍊火鑪甚夥扇韜爲煩西法取風地中不勞人力先周各廠蟄軻爲隧斜引旁通磐石蓋之鋪土地平而翕張之鐵機繫於鏢廠之方管氣輪一動彈指閒數百步外鑪火併熾力倍風箱若是者名曰風洞銅鐵重器自彼移此皆需百十人因棚拽車以便挪動然恐溼土埋輪因處處削木爲道凸其兩旁中



平如砥俾易推行若是者名曰木轍從前畫館之設寄於棧房  
現在堆積充牣不能不另蓋一區於是復有繪事之廠采辦銅  
鐵煤炭木料石灰繩纜等件分道而來連編累牝量移上岸非  
分儲之不可而收積材木之地非潮水可通不但出運爲難亦  
慮久而枯朽於是隄外南側旣建一區曰廣儲之廠又於隄北  
里許濱江淺港圍數百丈以鱗疊巨材上接山坳駐兵守之曰  
儲材之廠廠內除轉移執事外隨同洋人學習者若鋸木之匠  
造船之匠冷鐵之匠鑄鐵之匠刻模之匠鑄銅之匠水缸之匠  
反沙之匠車牀之匠鉗牀之匠其因營造各廠而招者若斲木  
之匠版築之匠鎚石之匠攻皮之匠共二三千人五方雜處漫

沈文肅公政書卷四

奏摺

二十九

無統紀易滋事端栖息無從亦難號召於是隄外復建二所居  
之在左者曰東考工所在右者曰西考工所皆以員紳統之早  
出暮歸乃無紊亂據日意格前稱華匠與洋匠器用不同言語  
不通事事隔閡况素諳繩墨者類皆中年以往心氣耗散往往  
不能探蹟通微請各廠分招十五以上十八以下有膂力悟性  
者或十餘人或數十人俾易教導名曰藝徒現所招已及百餘  
又不能無以鈐束之於是復有藝圃之設各廠事務猥煩委派  
員紳近增至百餘曉鐘出隄躬率工作指揮奔走見星始歸饋  
餼在道每遇暴風驟雨借蓋無從不能不小築數間以資憩息  
於是復有隄內官廳之設傭工雜作是有健丁日每八九百人

非以兵法部勒則散而難稽呼而不應於是每十人以什長一人束之每五什長以隊長一人束之特派勤能之武弁統焉然必寢息有所竈厠有所稽查有所因傍山結壘略如營房是爲健丁營之設凡此者數月以來已皆趕辦計可先後告竣其餘若鍊鐵鑪甄片之窰燒煤骨之窰鍛蜃灰之窰以及浸木甄槽等處或纜興工或纜擇地經營之後當更陸續奏聞此船隄內外之情形也鐵廠地基去冬以來開土釘樁以及嵌填石屑石灰皆已就緒應行補苴者亦屬無幾惟所需堅軋方石厥數甚鉅合計五廠需軋數百萬方需石則自長二丈三尺六寸至一尺二寸五分者計十萬有奇堅軋以海船運於下游數目旣多

沈文肅公政書卷四

奏摺

三十

非數百起不能盡之石質粗重運載更難卽源源到工但移一石非數人不可况剗方琢平勢難用驟際此盛夏酷暑石上如沃熱湯凡椎鑿者下蒸上曝敲火生光膚焦肉泡故雖監工日號迄今牆基未就廠內橫梁需堅木一百五六十根每根長須七丈二尺有奇圍圓八尺以上近地搜採無此巨材現飭員往暹羅三馬丹叻嘮呷等處覓購窮海帆檣往來第憑風汛更非刻日可期所幸機器已齊并有現成輪軸倘船材該備年底船身可就尙易圖成惟斲輪之方總俟營構齊全方有眉目此大鐵廠之情形也洋將德克碑自到工以來觀隄內運載之艱願往南洋訪購載貨夾板船已附搭輪船前往安南各國兩月以

後方得回閩理合附陳今先將機器到齊日期并船隘一切情  
形謹會同一等恪靖伯陝甘總督臣左宗棠福州將軍兼署閩  
浙總督臣英桂福建巡撫臣下寶第合詞恭摺謹由驛四百里  
具奏伏乞

皇太后

皇上聖鑒訓示謹奏

沈文肅公政書卷四

奏摺

三十一

遲木到工船身告成並鐵廠教造起限情形摺

同治七年十二月二

十六日

奏爲謹將遲木陸續到工第一號船身告成第二號船身經始並鐵廠教造起限情形恭摺具陳仰祈 聖鑒事竊臣於同治七年九月初五日業將第一起遲木到廠召匠趕工情形奏明在案當時所到之木僅有五百餘節匠作雲集斤斧繁興直至十月中旬而續到木船尙無確耗臣不勝焦灼只得一面派員赴廈門洋人船塢購致曲木四十一片直木一百二十九根以添船脅一面派員赴香港洋人船塢購致檣板七十片以爲船旁雖俱陸續到工而撮壤涓流隨到隨盡十月二十一日第二

沈文肅公政書卷四

奏摺

三十二

起船麻勒阿立三 到據日意格報稱內載曲木二百七十餘節方木一百九十餘根檣板三百六十餘片二十七日第三起船安密喇到據報內載曲木一千二百二十餘節方木二百二十餘根檣板一百九十餘片船材既足添募省外各匠加緊課功所有船脅底骨灰絲縫節均一律完竣內骨旣成旋封外板分段嵌鑲鱗次而上逐日增高惟尾脅之際骨節窪隆相去數尺封釘匪易於是該洋匠等拗設木氣筒一座長約三丈有奇承以臥架筒之首尾各戴鐵蓋旁結板棚安置湯鑪一具湯鍋之側綴以銅管通於氣筒八巨板於筒中鑄固鐵筭閉氣而蒸之歷兩時許便柔韌如牛皮然後以釘尾脅曲折隨心不煩繩

削辰下外板既封內板亦齊船身木工計已集事此後分鈐鐵  
棊安頓鐵脅橫梁須加一月之功布置輪機包裹銅片以及油  
漆妝飾等事須加兩三月之功再得一月試演駕駛便可展輪  
出洋十二月初九日第四起船悅諾花思得到據報內載曲直  
木一千七百五十六節十三日第五起船巴奴格到據報內載  
檣木八百零四根竊思前此因木料費手致船工稽遲若必俟  
第一號船工盡完始將第二號開造未免曠日糜費因先於鴨  
中預疊第二號船臺可造八十四匹馬力者現在四船接續而到  
木料既不止供一船之需因一面飭趕第一號未竟之工一面  
飭將第二號龍骨鏗削鋪排擇於本月二十七日興工該洋匠

等樣板已成中國匠人卽其分注尺寸施之斧鋸駕輕就熟尤  
易就緒鐵廠本年以來疊石絜甑牆基已就惟梁柱瑰材苦難  
覓購前日意格擬用鐵柱已試鑄一根費重工遲告齊不易現  
擬仍參用外洋大木而運道險遠總須來年方可節次到工查  
合同內載五年限期以鐵廠開廠之日爲始今經費如此其絀  
成廠又如此其難爲日愈多則需費愈鉅所幸前者暫搭各廠  
可以次第興工現在暫搭打鐵之廠則船上鐵軸鐵脅俱能打  
造暫搭鑄鐵之廠則大而跨柱小而齒輪俱可成功地窖烟鑪  
亦尙適用茲據日意格稟稱所有五年之限請以明年正月爲  
始察看省外各匠日與洋人共事口講手畫頗能心通其意惟

輪機之分度水氣之升合非日久融會貫通莫能盡探底蘊耳  
合將暹木陸續到工第一號船身告成第二號船身經始併鐵  
廠起限教造情形會同一等恪靖伯陝甘總督臣左宗棠福州  
將軍臣文煜閩浙總督臣英桂福建巡撫臣下寶第合詞恭摺  
由驛四百里具奏伏乞

皇太后

皇上聖鑒訓示謹奏

沈文肅公政書卷四

奏摺

三十四

皇太后聖鑒訓示謹奏

皇太后

由驛四百里具奏伏乞

御覽臣文煜閩浙總督臣英桂福建巡撫臣下寶第合詞恭摺

奏摺由驛四百里具奏伏乞

皇太后聖鑒訓示謹奏

由驛四百里具奏伏乞

第一號輪船下水並續辦各情形摺同治八年五月十二日

奏爲第一號輪船下水並續辦各情形恭摺具陳仰祈 聖鑒  
事竊臣於七年十二月二十六日業將船政一切工程奏明在  
案本年正月起廣召驗鑽各匠黏灰穿孔寒罅滙釘鐵匠打鑲  
鐵梁鐵脅鐵條等件兩月之久始行蕆事三月初旬船匠始得  
剝雕梁座鬪攏機器車治舵梳鐵匠拆移輪機水缸等件上船  
配合漏嵌泡釘螺餅兼製銅管氣筒尾輪鐵棍等事如是者復  
一月有奇四月以後船內之匠則造艙堵戰枰梳架旋車舢板  
等件船外之匠則趕包龍骨銅皮分造重軛凹槽下水托軛等  
件內外完備乃加聖洋油聯鈐銅板如是者復二十日有奇四

沈文肅公政書卷四

奏摺

三十五

月之杪日意格稟稱船上大小工程一切告竣請期下水臣飭  
監工員紳覆驗無異因諏五月初一日乘午潮漲滿縱船入江  
先期一日用巨鑊煮牛膏豕脂胰皂油等物數十斛灌入船底  
凹槽凝厚寸許將船臺初疊之木節節撥下另墊木楔使船身  
低倚兩旁托架跗萼相銜留船旁撐柱數十根以支之屆期臣  
躬率提調周開錫及各員紳致祭 天后江神土神船神向午

潮平日意格督匠作人等盡拔撐柱將船頭所銜木楔衆斧齊  
敲使船勢全力趨下再將船頭托軛鋸斷鋸甫過半船看然自  
行一瞬之間離岸數十丈船上人乘勢下旋拋泊江心萬斛艤  
幢自陸入水微波不濺江岸無聲中外歡呼詫爲神助辰下方

升桅竿繫帆纜安牀爨添旗幟製號衣整礮械以備出港適提  
調道員胡光墉同管駕官副將銜遊擊貝錦泉續募通曉輪機  
之中國舵工水手八十餘人到工伏念新船如生馬非銜轡均  
調恐不相習且一律用中國人駕駛初試風濤尤當慎益加慎  
因飭該管駕等就船上加緊練習由近漸遠七月閒當可逕出  
大洋駛赴津門請

旨簡派大臣勘驗此第一號下水之情形也第二號之船自開  
工以來匠作等駕輕就熟工程較速現邊板已封三分之一再  
有兩三月亦可下水第三號船臺底椿俱如法釘齊全架一成  
便可興造木料一節日意格所購者年內已到五起業經臣等

沈文肅公政書卷四

奏摺

三十六

奏明在案本年二月初十日第六起報到二月二十八日第七  
起報到三月初十日第八起報到三月二十九日第九起報到  
四月十二日第十起報到凡五起計統裝曲直木及檣板六萬  
六千六百四十六幅地去年委員劉國泰往南洋所辦者於二  
月十七日報到船名曰法蘇甲里凡載檣木鐵抄打馬輻轆武  
結嚙啣峇蚶等木一千八百四十餘節石來板二千七百八十  
餘片其中可供鐵廠橫梁之用者不少目下良材屬至船工自  
易圖成惟機器之出專由鐵廠閩省春夏陰雨連綿版築不易  
監工員紳披蓑荷笠號召泥滓之中數月以來甄垣石檻石簷  
一律完竣案稅采楠亦皆裁量如式而鑄匠方趕造各種船上



器具未遑兼鑄鐵柱是以棟宇未得觀成現首船下水鑄工稍鬆當飭刻期趕辦鐵廠告竣便可講求輪機關竅輪機之巧能應手得心船事乃中邊俱徹也前派總監工道員葉文瀾赴暹羅采辦檣木據報於三月初一日安抵噶叻派遊擊吳世忠舉人蔣錫璠等先赴暹羅葉文瀾先將噶叻所辦木料雇船起運亦於四月初六日前赴暹羅矣第一號船擬名曰萬年清第二號船擬名曰湄雲暫資號召應俟抵津勘驗再懇

恩旨寵錫嘉名以光海宇其萬年清謹委遊擊貝錦泉管駕湄雲謹委遊擊吳世忠管駕貝錦泉原駕之華福寶委都司銜貝珊泉管駕以專責成合將第一號輪船下水日期併第二號第

沈文肅公政書卷四

奏摺

三十七

三號工程以及采辦暹木營造鐵廠遴委管駕各情形謹會同一等恪靖伯陝甘總督臣左宗棠福州將軍臣文煜閩浙總督臣英桂福建巡撫臣下寶第合詞恭摺由驛四百里具奏伏乞皇太后

皇上聖鑒訓示謹奏

輪船監駛入津靜候派驗摺

同治八年八月二十六日

奏爲第一號輪船試演漸熟專員監駛入津靜候 派驗恭摺  
具陳伏祈 聖鑒事竊<sup>臣</sup>於本年三月二十五日因船工將成  
請

旨飭調前臺澎道吳大廷來閩督同管駕官赴津請驗五月十  
一日復將第一號新船下水及一切工程奏明在案維時船上  
機器滾鑪銅輪各大宗雖已如法安置而零星大小器具爲開  
駛所必需者尙難數計下水之後<sup>臣</sup>一面飭管駕官員錦泉督  
率目兵駐紮船上練習駕駛操演礮械以臻純熟一面飭日意  
格催中外匠作逐件製造大白桅舵烟筒煤艙舢板小至明窗

沈文肅公政書卷四

奏摺

三十八

水管繩纜欄梯精自舵表氣表遠鏡號鐘鑼至帆旗衣裝牀爨  
倚几計兩月有餘大致完備八月初日意格先同各洋匠等  
在隄前升火試驗以覘靈鈍八月十三日候補同知黃維焯會  
同遊擊貝錦泉等駛出閩安館頭壺江等處二十日申刻<sup>臣</sup>親  
督日意格暨各員紳將領登舟出港向晚寄旋熨斗內洋二十  
一日丑刻東北風大作潮聲甚壯逆風衝潮徑出大洋以試驗  
機之堅脆駕駛之巧拙星月在天一望無際銀濤萬疊起落如  
山<sup>臣</sup>不勝眩暈而在事人等皆動合自然隨於大洋中飭將船  
上巨礮週迴轟放察看船身似尙牢固輪機似尙輕靈掌舵管  
輪礮手水手人等亦尙進退合度由正東轉向福甯洋面繞南

菱北菱各島而歸謹按部頒營造尺核計船身長二十三丈八尺有奇廣二丈七尺八寸有奇船頭高二丈六尺一寸有奇船尾高二丈三尺三寸有奇其鬻水也虛船則船頭五尺五寸有奇船尾八尺四寸有奇重船則船頭一丈二尺六寸有奇船尾一丈四尺五寸有奇其任重也除氣鑪機器官艙煤艙外可裝貨七十萬斤煤艙兩所可裝煤二十五萬餘斤煤艙之間爲前後氣鑪兩座前鑪火門五高一丈六寸有奇深九尺九寸有奇廣一丈五尺七寸有奇後鑪火門四高深均如前鑪廣一丈二尺五寸有奇鑪後機器承之器高一丈二尺有奇座廣九尺有奇長一丈有奇火炎湯沸蒸氣盤鬱匣中船尾暗輪每一時轉

沈文肅公政書卷四

奏摺

三十九

九千三百六十餘遍其出也逆風逆水一時行七十里而遙速乘風潮折回一時行九十里而近以風平浪靜計之蓋閱一時以八十里爲準云輪機船身旣已并試駕駛亦漸純熟可以遠出重洋前臺灣道吳大廷先於七月十一日病痊遵旨到閩謹擇八月二十六日展輪北上駛赴津門合無仰懇天恩於該船到津之日簡派大臣勘驗所有未能如法之處恭候

旨下再行督飭中外員匠悉心研究損過就中庶幾獲所遵循漸臻完善至船中妝飾仰體我

皇上崇儉之意務求樸固不敢稍涉浮華伏祈 寵錫嘉名以

光海宇其船身機器滾鑪之式恭繪總圖呈送軍機處以備  
御覽至船骨機關鑪竅條目孔繁俟更細意講求分圖貼說彙  
帙進呈除將管駕官以下銜名并酌擬月給薪糧數目造冊咨  
部外謹會同一等恪靖伯陝甘總督臣左宗棠福州將軍臣文  
煜閩浙總督臣英桂福建巡撫臣下寶第恭摺具奏伏乞  
皇太后

皇上聖鑒訓示謹奏

沈文肅公政書卷四

奏摺

四十

奏爲第二號輪船下水並續造第三號第四號各情形恭摺具  
陳仰祈 聖鑒事竊船廠本年八月開第一號輪船北上之後  
第二號船身鑽艙各工已有三分之二輪機汽鑪俱安排妥帖  
計船上大端所短者惟鐵脅鐵梁及桅舵戰坪等件一經完竣  
以常法論之便可入江嗣據日意格議稱前者第一號輪船下  
水之後尙需兩二月之久始能出洋者以一切零星器械未全  
工匠在船操作手足難展登降殊煩致稽時日此次當移後工  
爲前工卽在架上安置各件器具然後下水試輪少加修飾便  
可出洋演駕當時在事員紳分廠催趲中外匠作工程習熟不

沈文肅公政書卷四

奏摺

四十一

及兩月之久大自桅舵舳板鐵櫃烟筒小至汽管水筒欄梯釘  
鎖粗自布帆鐵纜油繩轆轤精至向盤時表遠鏡湯鍼一律完  
備因擇十一月初四日乘午潮入江屆期日祇告 天后江神

土神旋赴船上勘驗已畢該工匠等如法推船下架自在游行  
毫無窒礙次日在鴨前江面升火試輪輪機亦稱靈便適該船  
之管駕官遊擊吳世忠到閩派令駐船監製旗幟號衣髹漆內  
外船板檢點軍火礮械申定號令章程月終當出大洋駕駛第  
三號之船亦於初四日安放龍骨其船脅數百幅前兩月開分

工繩削業已告齊辰下均已一律鬪合年底可上旁舩第四號  
現方添繫船臺臺工一畢便擇日安放龍骨開造船身今將第

二號輪船下水暨第三號第四號經始情形謹會同一等恪靖  
伯陝甘總督臣左宗棠福州將軍臣文煜閩浙總督臣英桂福  
建巡撫臣卞寶第恭摺具奏伏乞

皇太后

皇上聖鑒謹奏

沈文肅公政書卷四

奏摺

船政漸著成效懇擇尤獎勵摺 同治九年二月初十日

奏爲船政漸著成效懇俟輪機創造就緒 恩准將中外出力人員擇尤獎勵以資鼓舞恭摺籲陳仰祈 聖鑒事竊 臣 於同

治八年十一月十一日續將第二號輪船下水情形奏明在案十二月十七日前任臺灣 臣 吳大廷督駕萬年清駛回工次仰賴

聖主福庇海若効靈風靜波恬人人額慶初九日第二號湄雲器具告備管駕官遊擊吳世忠調度水手人等整理旗幟礮械申明約束申刻 臣 率同監督日意格及各員紳將領登舟出洋是晚寄旋媽祖灣初十日黎明逕望大洋展輪而出水天無際

沈文肅公政書卷四

奏摺

四十三

午後回舵拂福甯左界繞南菱北菱各島揚帆而歸 臣 親在洋

面細察掌舵管輪礮手水手人等俱能操縱如意船身尙稱牢

固輪機亦頗輕靈二十七日日意格偕吳世忠又駛至福安於

洋面較羅盤之有無參差本年正月初四日駛回工次本月初

五日載采辦京米委員前赴臺灣購米俟購有成數飭萬年清

前往裝運 臣 查外洋船式與中國迥不相同船身固以木料爲

大宗而銅鐵零星器具名目繁多雖洋人亦未易悉數創始之

艱難非語言所能罄今兩船就緒歷試外洋第三號之船四月

可以下水第四號亦刻日興工此製造之漸著成效也有船不

能駕駛與無船同曩者官私均購有輪船因駕駛未得其人卒

之呼應不靈臂難使指與事以來招中國素習洋船之人爲管駕官當其任者皆有奮於功名之念不敢惟利是視而以効命聖主爲榮龍窟蛟門無異輕車熟路此駕駛之漸著成效也惟前此四號輪機係購自外洋若中國鼓鑄無成則買續還珠教者學者均難逃其責現在打鑄銅鐵瀆鑪各廠兩年以來所造廠中應用大小機器及船上所需雜件不下萬計去冬之杪起造一百五十四匹輪機先由畫廠繪圖以定其廣次由模廠刻木以肖其形然後照模逐件鑄鑄刮磨鬪合成副臣嘗細詢駐廠員紳工匠人等俱以爲頗有把握如果鑄造成功與購自外洋者合轍可否籲懇

沈文肅公政書卷四

奏摺

四十四

天恩將出力之中外文武員弁工匠人等容臣擇尤請獎以資鼓舞而收後效出自逾格鴻慈理合會同一等恪靖伯陝甘總督臣左宗棠福州將軍臣文煜閩浙總督臣英桂福建巡撫臣下寶第恭摺由驛具陳伏乞

皇太后

皇上聖鑒訓示謹奏



三號輪船下水並續造情形摺

同治九年五月十四日

奏爲第二號輪船下水並續造第四號情形恭摺具陳仰祈

聖鑒事竊<sub>臣</sub>於本年二月初九日業將第二號船成出洋隨即

前往臺灣情形奏明在案第三號龍骨船脅去冬卽已安排當

時正在趨辦第二號出洋事宜僅一面分工繩削新正以後始

得督率工匠畢力其閒四月下旬據監督及在事員紳等稟稱

外而鑽艙內而輪機一律齊備可以下水<sub>臣</sub>謹擇五月初一日

已刻祭告天后江神土神乘潮縱江推移如法所有桅柁篷

鈎舳板已先期製造可以隨時安置船上應需者惟零星器具

以及刮摩漆門艙牀龔等事一經就緒便可出港試輪<sub>臣</sub>竊

沈文肅公政書卷四

奏摺

四十五

維船成之後以駕駛爲急務年來招中國之素習洋舶者充管  
駕官固操縱合法而出自學堂者則未敢信其能否成材必親  
試之風濤乃足以覘其膽智否卽實心講究譬之談兵紙上臨  
陣不免張皇去年派員到香港南洋各處購致夾板輪船以資  
藝重練習無如願售者皆朽窳之餘不適於用購歸修整價又  
不貲遂作罷議而登舟練習之事終不可以久延辰下第三號  
八十四匹馬力輪船告成其式本屬戰艦利於巡洋擬以學堂上  
等藝童移處其中飭洋員教其駕駛由海口而近洋由近洋而  
遠洋凡水火之分度礁沙之夷險風信之徵驗桅柁之將迎皆  
令卽所習聞者印之實境熟極巧生今日聚之一船之中他日

可分爲數船之用隨後新舊相參踐更遞換冀可漸收實效第  
四號係一百五十四馬力龍骨業已安置船脅鬪合亦已過半  
南洋木料陸續到工匠作漸皆熟手當易厥功茲謹將三號擬  
名福星四號擬名伏波以資號召當否之處伏候 聖裁合將  
第三號下水暨第四號製造情形謹會同一等恪靖伯陝甘總  
督臣左宗棠福州將軍臣文煜閩浙總督兼理福建巡撫臣英  
桂合詞恭摺具奏伏乞

皇太后

皇上聖鑒謹奏

沈文肅公政書卷四

奏摺

四十六

請 簡派輪船統領摺 同治九年八月初七日

奏爲籲請 簡派輪船統領以資訓練而靖海疆恭摺具陳仰  
祈 聖鑒事 臣 維輪船之設其利較戰船數倍其難亦較戰船  
數倍戰船伍符尺籍恆取土著之人一入標營便知定分層層  
鈐轄安於固然輪船則博采廣搜不拘成格耐風濤者未必習  
輪機習輪機者未必精駕駛其出色當行之技雖籍隸閩廣江  
浙大半久於洋舶之中且有生長南洋眷屬未入內地者其天  
性誠篤心地明粹者固不乏人而漸染既深習氣難除者亦復  
不少且平日等夷相視去就自由繩以營規幾不解爲何故此  
約束之難也兵船恃槍礮爲聲威槍礮生疏非特不能命中利

沈文肅公政書卷四

奏摺

四十七

器與空手同且臨敵倉皇將有自焚之患戰船可就地操演近  
日輪船所用槍礮多於後膛安放子藥非海外絕島試之則恐  
傷人此操演之難也輪船號數漸多不能不分布各口平日各  
不相聞臨時各不相習雖有事調合一處而聲氣隔闕號令參  
差此稽查聯絡之難也具此數難寄諸疆臣則職守所羈無從  
歷風濤以兼顧責之駕弁則勢分相埒無從聯指臂以和衷合  
無仰懇

天恩簡派熟悉海疆忠勇素著之大員一人以爲統領俾訓之  
禮義以生其忠 君愛 國之心練其技能以壯其敵愾同仇  
之志庶幾南北一氣寰海鏡清矣愚昧之見是否有當伏候

宸裁謹會同一等恪靖伯陝甘總督臣左宗棠福州將軍臣文煜閩浙總督兼署福建巡撫臣英桂由驛四百里具奏伏乞

皇太后

皇上聖鑒訓示謹奏

沈文肅公政書卷四

奏摺

四十八

奏為恭謝

天恩馳報任事日期仰祈 聖鑒事竊臣於同治九年十月二

十三日奉

上諭沈葆楨現丁父憂懇請簡員接辦本應俯如所請惟船政

緊要未便遽易生手著自日後仍照常經理等因欽此又於九

年十一月十二日奉

上諭沈葆楨陳情終制原出至誠惟辦理船政仍可素服從事

著遵前旨毋再固辭等因欽此又於十年二月初九日奉

上諭文煜等奏沈葆楨百日孝後患病未能赴工現工程喫緊

沈文肅公政書卷四

奏摺

四十九

著趕緊調理一俟病痊迅速赴工等因欽此又於十年四月二

十二日奉

上諭文煜等另片奏船政大臣因病不能赴工請旨遵行沈葆

楨著服闋後再行赴工以副委任等因欽此伏念臣才識庸愚

疊蒙 覆幬二年曠職

聖人鑒讀禮之忱九譯輸誠 盛世重濟川之業敢辭艱鉅勉

効涓埃臣於本年十二月十二日釋服十五日赴工恭設香案

望 闕叩謝

天恩敬謹任事一切情形容俟詳細察看會商將軍督撫臣續

行具奏所有任事日期並感激下忱理合先行由驛馳陳伏乞

皇太后

皇上聖鑒訓示謹奏

沈文肅公政書卷四

奏摺

五十



七號八號輪船出洋並以次下水酌改船式各情摺

同治十二年正月二十七日

年正月二十七日

奏爲第七號第八號輪船出洋第十號第十一號輪船下水並第十二號酌改船式各情形恭摺具陳仰祈 聖鑒事竊聞廠七號八號九號輪船下水並十號十一號輪船起工業經營撫臣節次奏明在案比據提調夏獻綸稟稱第七號之揚武第八號之飛雲先後竣工出洋試演計順風順水揚武一時約行百里飛雲一時約行八十里輪機靈捷礮位精良第九號之靖遠工尙未畢再需三四箇月方可出洋第十號之振威十一年十一月十一日下水第十一號之濟安十二月初四日下水船身

沈文肅公政書卷四

奏摺

五十一

既竣水缸瀉鑪機器等事飭今次第安排第十二號於九月二十二日安上龍骨目下船殼甫齊正在封釘舳板等語臣視事後察看飛雲工堅料實與萬年情伏波安瀾相伯仲而兵船之用則以揚武爲長鑪座輪機僅與水面相平烟筒三節可以隨意升降利於避礮本船配大礮十有三尊利於攻敵馬力加多行駛尤速然而造船之費購礮之費薪糧之費煤炭軍火之費則不啻倍於飛雲矣揚武所用多英國之前膛礮摧堅及遠迴異尋常而靈巧則不如飛雲所用之布國後膛礮蓋前膛礮築藥裝子洗礮均須人出艙外身當礮口既慮敵礮見傷又防餘藥遺患後膛礮則裝放之時敵人無從望見而內膛螺絲中有

無渣滓黏滯從後窺之便一目了然惟打放數十次之後卽須暫停否則恐其熱而炸裂蓋靈巧與堅實互有短長在熟知其性者舍所短而用所長庶幾收其利不受其害第十二號輪船擬名永保馬力百五十匹本與飛雲一律辦理而養船經費支絀異常臣擬令監督日意格仿照外洋商船規制將房間移建上層俾中艙底艙地位寬闊多裝貨物以便招商試行領運不苛繩以成法冀收效於將來如荷 恩俞請將第十三十四十五等號輪船一體改造廣閭閻之生計節 國家之度支然此第屬一時權宜若經費漸裕仍當仰體我

皇上力圖自強之意講求兵船新法以固疆圉而壯聲威臣愚

沈文肅公政書卷四

奏摺

五十二

昧之見是否有當謹會同陝甘總督一等恪靖伯臣左宗棠閩浙總督兼署福州將軍臣李鶴年福建巡撫臣王凱泰恭摺由驛四百里具陳伏乞

皇上聖鑒訓示謹奏



船政經費支絀摺

同日

奏爲覆陳船政經費支絀情形仰祈 聖鑒事竊臣鶴年臣凱泰於同治十一年十二月二十日准戶部咨本部議覆陝甘總督左宗棠奏閩省輪船經費不敷請於該省應解甘餉內酌撥一摺閩省造船經費前據英桂等奏每月牽算不過四萬兩留撥閩海關銀五萬兩已屬寬爲籌備究竟大小船隻每隻需銀若干每月經費實需若干並造成後管駕員弁薪費若干請飭下福州將軍閩浙總督福建巡撫核實估計奏報到日再由臣等酌核等因奉

旨依議欽此查左宗棠之議立船政也中國無一人曾身歷其

奏摺

五十三

事者不得不問諸洋將其約自鐵廠開工之日起立限五年成船一十六號估費三百萬兩雖中外員匠有生熟巧拙之殊鋼鐵木料有貴賤之異零星物件外國取諸市肆而皆足中國非一一本廠自造卽購諸重洋然所估之數尙不甚相遠至以結款四十萬兩爲購器募匠買地建廠之需則昔之所估與今之所費大相懸絕專就建廠而論一椽未立一瓦未覆第購民田釘木椿培山土地基甫固而所費已不貲矣蓋洋將所見者外國已成之廠而未見當日經營締造之艱難所以臣葆楨初次任事時卽有應辦工程應發款項多從前未經議及之奏也原議鑄鐵爲一廠打鐵爲一廠模子爲一廠水缸兼打銅爲一廠

輪機兼合攏爲一廠。合共五廠。後增拉鐵槌鐵鐘表帆纜火甌舢板六廠。而打鐵輪機鐘表又各有分廠。計船臺三座。船亭五座。船槽一座。外凡爲廠一十有四。原議學堂兩所。後添繪事院。駕駛學堂。管輪學堂。藝圃四所。臣葆楨察看其均係不容已之需。懍遵我

皇上勉爲其難。毋得瞻前顧後之

旨。不追繩其原估之疏漏。而務責其全局之必成。所有添設緣由。均經奏明在案。雖於同治八年正月初一日起限實則十年。秋閒廠工始畢。購器建廠費百餘萬。此結款不敷。挪用月款之實在情形也。添廠則添機器添匠丁。並添工費。原議監督暨洋

沈文肅公政書卷四

奏摺

五十四

員匠三十八員名。月薪費銀八千九百七十八兩。嗣增拉鐵槌鐵洋匠銀四百兩。監造工程洋匠銀五百兩。駕駛管輪教習銀七百五十兩。教造船上鐘表洋匠銀四百四十兩。德克碑教練公費銀五十兩。各洋匠夜課藝徒讀書銀二百兩。洋匠禮拜加工夜作加工銀六七百兩不等。中國匠丁人數亦逐廠隨之而增。原議兩學堂藝童六十人。今則藝童藝徒合三百餘人。始也月給贍銀四兩。學業日進。則贍銀日增。其自南洋來通外國語言文字略知機器之學者。贍銀月數十金。此月款始而充裕。繼而支絀之實在情形也。成船日多。票稅日絀。十一年所八票稅。僅七萬兩。按月勻算。得五千餘兩。就分撥各省後。目下閩省存

船計之揚武薪費月番銀三千二百五十兩萬年清飛雲月各二千一百二十六兩五錢建威練船月一千四百八兩四錢鎮海水師船月六百四十八兩八錢共番銀九千五百六十兩二錢折紋銀八千六百九十一兩九分一釐而煤炭之費修理之費不與焉且分撥各省輪船均須在閩教練數月此數月之薪費不得不出於閩此養船經費不敷因而挪用月款致月款愈絀之實在情形也每船工料價銀若干驟難一一釐析臣等謹就每月額定經費計之洋員匠薪費約一萬二千兩監工員紳薪水暨書役工伙約一千二百餘兩各匠工食約一萬一千五十餘兩健丁運夫排工口糧約四千三百九十餘兩藝軍贍銀約八百八十餘兩藝徒辛工約八百一十兩零通事辛工約九十兩各船薪費八千六百九十一兩零共三千九百九十餘兩而歷年採辦大小料件勻月彙算數與相當蓋每月實不敷銀二萬餘兩合無仰懇

沈文肅公政書卷四

奏摺

五十五

天恩准自本年正月爲始每月添撥銀二萬兩臣等再行極力樽節以收垂成之功俟限滿洋將撤回此二萬之款卽行停撥臣等愚昧之見是否有當謹會同陝甘總督一等恪靖伯臣左宗棠合詞由驛四百里具陳伏維

皇上聖鑒訓示飭部議覆施行謹奏

再<sup>臣</sup>於邸抄中伏讀同治十一年八月二十二日

上諭水師所用本以施柁放礮爲優劣何得藉口演習弓箭致開陸居之漸所有長江水師及江蘇新改之外海內洋內河水師均著專習槍礮毋得再習弓箭等因欽此查輪船與長江水師事同一律所有船上之官弁兵勇應懇

天恩准其免習弓箭俾專心訓練槍礮精益求精是否有當伏

乞

皇上聖鑒訓示施行謹奏

沈文肅公政書卷四

奏摺

五十六

船政物料仍免納稅釐片

同日

再准江西撫臣劉坤一咨開同治十一年八月二十九日奉  
上諭劉坤一奏近年來各省興辦善後工程及造船修隄需用  
木植物料甚多出外購買之員因有免完釐捐印照其跟丁船  
戶紛紛夾帶私貨乘機闖關不候稽查借詞津貼運費抗不完  
納釐稅並有不肖委員轉爲庇護卡員亦或瞻徇情面勉強放  
行流弊日滋請飭停止發給印照等語似此情形恐不獨江西  
一省爲然著各直省督撫嚴查卽行禁止不得發給免完釐稅  
印照等因欽此<sub>臣</sub>等伏查船政需用各項料件向係遴委委員  
親赴各處採辦並給發免稅印照逐一填明件數以杜弊端從  
沈文肅公政書卷四

奏摺

五十七

無敢不候稽查夾帶私貨者欽奉前因自應遵照辦理惟現在  
輪船經費支絀異常若完一項稅釐卽多一項經費合無仰懇  
皇上俯念船政係欽奉  
特旨興辦事件與尋常善後工程不同且船政所需經由洋稅  
關者多過內地釐卡者百不及一通商條約外國師船駛入中  
國修理船隻不納各項稅餉卽洋商船用雜物各口皆准免稅  
倘外藩邀寬大之典而天朝軍國重事反不得與之一例  
辦理恐於政體有妨若新關免稅而內地完釐則事涉兩歧所  
得不過錐刀之末恭繹

諭旨似爲嚴杜夾帶私貨而言並非於工程中之物料計較釐

稅竊思印照既逐一填明件數倘有夾帶一經查驗便水落石出臣等當嚴飭採辦委員及跟丁船戶人等每過關卡靜候查驗放行倘有夾帶營私各項情弊察出立予盡法究辦其船政物料伏乞

天恩仍予免納稅釐以資撙節是否有當恭候 聖裁謹合詞

附片陳明伏乞

皇上聖鑒訓示謹奏

沈文肅公政書卷四

奏摺

五十八

續陳各船工程並挑驗匠徒試令自造摺同怡十二年六月二十日

奏爲續陳各船工程並挑驗匠徒試令放手自造情形仰祈

聖鑒事竊臣於本年正月二十七日業將第七號第八號輪船

出洋第十號第十一號輪船下水第十二號酌改船式各情形

奏明在案二月第九號靖遠工竣以留閩補用千總鄭漁管駕

二十八日試洋順風順水約每時可行七十里輪機靈捷完好

惟礮位向外國定製往返數萬里未克如期而來耳第十號振

威閩六月工亦可竣以留閩補用千總羅昌智管駕擇吉試洋

第十一號濟安七月底可以竣工第十二號永保閩六月可以

下水該船之水缸機器車軸等項均於船臺上安置安帖下水

沈文肅公政書卷四

奏摺

五十九

後兩箇月即可出洋第十三號於二月初二日安上龍骨船身

已得過半工程第十四號於六月初九日安上龍骨船脅尙未

就緒此近日各船工程之實在情形也自增月款二萬之後臣

得以廣購木料南風司令暹羅仰光所產絡繹而來將來十二

號下水十五號即可安上龍骨雖成船未能適符限期而逾期

計不甚遠然當時創始之意不重在造而重在學臣與監督日

意格約限滿之日洋匠必盡數遣散不得以船工未畢酌留數

人如中國匠徒實能按圖仿造雖輪船未盡下水卽爲教導功

成獎勵優加犒金如數必不負其苦心倘洋匠西歸中國匠徒

仍復茫然就令如數成船究於中國何益則調度無方教導不

力臣與該監督均難辭其咎該監督請六月自模廠始挑選匠徒之聰穎者逐加驗試洋匠頭授之以圖令其放手自造是後洋匠均不入廠俟其自造模成察看照合與否稍有絲毫未協再為詳說竅窳令其改造試之又試至再至三務期盡其技能而止模廠既畢他廠繼之臣以其所議尙屬責實飭令次第舉行毋令中國匠徒得以附會塞責愚昧之見是否有當謹會同陝甘總督一等恪靖伯臣左宗棠福州將軍臣文煜閩浙總督臣李鶴年福建巡撫臣王凱泰恭摺由驛四百里具陳伏乞皇上聖鑒訓示謹奏

沈文肅公政書卷四

奏摺

六



統領隨時操演片

同日

再輪船之設必聲勢聯絡如身使臂如臂使指倉卒徵召方足以資敵愾前以養船經費支絀署督臣文煜等奏請分撥各省奉

旨允行計誠出於萬不得已第仍須於分撥之地力籌聯絡之方雖各省大吏可以督其勤加操演而有事合之一處各不相習甚慮驅策不靈<sub>臣</sub>與統領臣羅大春熟商若俟其來閩修船順便閱操則曠日太久且有本省自有船鳴可修不必定歸閩廠者若紛紛召之而至則於其本省巡洋捕盜諸務窒礙殊多計不如統領躬任其勞隨時周歷各口校閱凡遇統領出洋將

沈文肅公政書卷四

奏摺

六十一

赴某省先期由驛咨會某省督撫惟海道瞬息可達驛遞有時遲延或統領船來而督撫之行知未到則由統領知照海關道卽時校閱其船上有練兵者亦一體操演所需子藥等項統由各該省應付爲統領者不敢以遠涉風濤爲憚而封疆大吏自必以不分畛域爲心<sub>臣</sub>愚昧之見是否有當謹合詞附片陳明伏乞

皇上聖鑒訓示謹奏

續陳輪船工程並練船經歷南北洋各情形摺

同治十二年七月二

十四日

奏爲續陳輪船工程並練船經歷南北洋各情形仰祈 聖鑒

事竊臣於本年六月二十日業將第九號輪船試洋第十三號

第十四號輪船起工並中國匠徒放手試造情形奏明在案閏

六月十八日第十二號永保船身灰鹼鑽孔鑲鈐船內艙堵輪

機水缸船底銅片各工告備臣謹致祭 天后江神土神船神

將船推送下水其桅杆烟筒煤艙銅管並帆纜等工八月間可

以蕙事該船寬長及齧水尺寸與伏波安瀾等船一律惟船面

前後增設艙房則仿照商船程式耳永保下水騰出船臺飭匠

沈文肅公政書卷四

奏摺

六十二

修理完固卽於二十四日安上第十五號龍骨二十五日第十

號之振威工竣監督日意俗親帶出洋展輪而出展輪而入洋

面則息火張帆將船左右折轉而行約計其適中者每時行七

十里輪機靈捷與靖遠同第十一號之濟安工亦垂竣臣擬調

管駕飛雲之涓洲營遊擊吳世忠於引 見後回工管駕其原

帶分撥山東之飛雲查有久充該船大副之都司銜林文和水

務諳練心地樸誠兼通英語堪以接管此各輪船續辦工程之

實在情形也其建威練船去年乘風北駛歷浙江上海燕臺天

津至牛莊始折而南本年二月教習洋員德勒塞駕船南行先

廈門次香港次新加坡次檳榔嶼六月始回工次計四閱月除

各馬頭停泊外實在洋面七十五日海天蕩漾有數日不見遠山者有島嶼縈迴沙線交錯駛船曲折而進者去時教習躬督駕駛各練童逐段膽注日記量習日度星度按圖體認期於精熟歸時則各童目行輪班駕駛教習將其日記子細勘對至於颶颳大作巨浪如山巔簸震撼之交默察其手足之便利如何神色之鎮定如何以分其優劣其駕駛心細膽大者則粵童張成呂翰爲之冠其精於算法量天尺之學者則閩童劉步蟾林泰曾蔣超英爲之冠臣謹拔張成呂翰管駕閩省原購之海東雲長勝兩輪船使獨當一面以觀後效此教練駕駛之實在情形也限期瞬息臣惟有力催洋員洋匠認真教導中國匠徒刻

沈文肅公政書卷四

奏摺

六十三

意講求以冀上副 聖懷於萬一愚昧之見是否有當理合會同陝甘總督一等恪靖伯臣左宗棠福州將軍臣文煜閩浙總督臣李鶴年福建巡撫臣王凱泰恭摺由驛四百里具陳伏乞皇上聖鑒訓示謹奏

船工將竣謹籌善後事宜摺 同治十二年十月十八日

奏爲船工將竣謹籌善後事宜請

旨定奪事竊惟船政之設原約造百五十四匹馬力輪船十一隻八十四匹馬力輪船五隻嗣督臣英桂議改第七號爲二百五十四匹馬力據該監督估計工料繁鉅較百五十四匹馬力增一倍有零請以一號抵作兩號經臣文煜等奏明在案共應大小成船一十五隻除第十號以上業經迭次奏明出洋外本年八月初六日第十二號之濟安試洋八月二十八日第十二號之永保試洋均一時以七十里爲率輪機之靈捷船身之堅固與安瀾等船大略相同九月十九日第十三號之海鏡下水計年內可

沈文肅公政書卷四

奏摺

六十四

以出洋第十四號輪船年內亦可下水惟第十五號須待明春然中國匠徒能放手自造與遣散洋匠兩無妨礙此船工將竣之實在情形也此後如爲節省經費起見則停止造船除修船養船而外一切皆可節省惟既絕難續不免盡棄前功而鵠巢鳩居異族之垂涎尤爲可慮若歲仍造船兩號則已成之緒不致中乖而洋人辛工歲可省十餘萬然中國員匠能就已成之緒而熟之斷不能拓未竟之緒而精之雖則歲告成船究竟毫無進境與我

皇上力圖自強之

旨迴不侔矣臣竊以爲欲日起而有功在循序而漸進將窺其

精微之奧宜置之莊嶽之間前學堂習法國語言文字者也當  
選其學生之天資穎異學有根柢者仍赴法國深究其造船之  
方及其推陳出新之理後學堂習英國語言文字者也當選其  
學生之天資穎異學有根柢者仍赴英國深究其駛船之方及  
其練兵制勝之理速則三年遲則五年必事半功倍蓋以升  
堂者求其入室異於不得其門者矣其學生中有學問優長而  
身體在弱不勝入廠上船之任者應令在學堂接充教習俾指  
授後進天文地輿算學等書三年五年後有由外國學成而歸  
者則以學堂後進之可造者補之斯人才源源而來朝廷不  
乏於用惟合之遞年成船二隻所費甚鉅本年所加月款二萬  
沈文肅公政書卷四

奏摺

六十五

可省而原定月款五萬必不能省也限期屆應如何辦理之  
處敢懇

皇上飭下各衙門速議具奏倘以前赴外國學習爲可行則數  
萬里長途驟試者不無疑懼

臣奉

旨後尙須與日意格及生童人等聲明約束詳議章程必事事  
得理之所安而後人人於心有所恃臣不揣冒昧謹會同一等  
恪靖伯陝甘總督臣左宗棠福州將軍臣文煜閩浙總督臣李  
鶴年福建巡撫臣王凱泰恭摺附驛馳陳伏乞

皇上聖鑒訓示謹奏

船政教導功成籲懇獎勵摺

同日

奏爲船政教導功成籲懇

天恩將出力之洋員匠併案獎勵并速籌帑銀回費俾得如期遣散以昭大信而杜虛糜事竊臣於同治九年二月間奏請俟輪機創造就緒懇將中外出力人員擇尤獎勵奉

旨允准在案嗣臣以丁憂交卸致未舉行自本年六月起該監督日意格逐廠考校挑出中國工匠藝徒之精熟技藝通曉圖說者爲正匠頭次者爲副匠頭洋師付與全圖卽不復入廠一任中國匠頭督率中國匠徒放手自造並令前學堂之學生繪事院之畫童分廠監之數月以來驗其工程均能一一脗合此

沈文肅公政書卷四

奏摺

六十六

教導製造之成效也後學堂學生既習天文地輿算法就船教練俾試風濤出洋兩次而後教習挑學生二名令自行駕駛當颶颶猝起巨浪如山之時徐覘其膽識現保堪勝駕駛者已十餘人管輪學生凡新造之輪船機器皆所經手合攏分派各船管車者已十四名此教導駕駛之成效也伏惟船政祇自強之一道而創始較他務爲獨難當一篲之甫施詎成山之敢望或以洋人祕其要領弗輕傳授爲疑或以中國狃於見聞無可攀躋爲慮仰賴 乾綱在握翊贊僉同既歷久而弗渝遂觀成之有日雖精益求精益求密尙有待於將來而步能亦步趨能亦趨已幸償夫始願想重譯爭效所長之意王 中朝有善必

錄之科茲據日意格將出力之洋員洋匠開單請獎前來臣逐  
加檢核尙無冒濫謹將原單抄呈 御覽候

旨遵行監督日意格始終是事經營調度極費苦心力任其難  
厥功最偉德克碑自同治九年二月後前赴甘肅臣左宗棠另  
有差使惟經始之時度地計功購料雇匠馳驅襄事亦未便沒  
其微勞應如何分別獎勵俾昭激勸之處出自 宸裁至合同  
內約明五年限滿中國員匠能自監造駕駛應加獎兩監督各  
銀二萬四千兩加獎外國員匠銀六萬兩又約明五年工竣每  
名另給辛工兩月并勻給回費三百七十八兩照現在洋員匠  
名數科算統共犒賞辛工回費需銀十五萬兩有奇合無仰懇

沈文肅公政書卷四

奏摺

六十七

天恩飭部速卽籌撥銀十五萬兩俾得於限內及時遣散不致  
坐食虛糜其中國出力之員弁工匠可否容臣一體併案保獎  
以資鼓舞而責後效出自逾格 鴻慈理合會同一等恪請伯  
陝甘總督臣左宗棠福州將軍臣文煜閩浙總督臣李鶴年福  
建巡撫臣王凱泰恭摺由驛四百里馳陳伏乞  
皇上聖鑒訓示謹奏

再閩廠計成輪船十有五號除鎮海一號駐天津湄雲一號駐牛莊海鏡一號歸招商局駕駛外祇餘十有二船辰下海防喫緊揚武飛雲安瀾靖遠振威伏波皆兵船也前囑日意格向赫德借海關之凌風輪船已到臣擬派此六號常駐澎湖隨之練習合操陣式福星一號駐臺北萬年清一號擬駐廈門濟安一號擬駐福州以固門戶尙嫌單薄永保琛航大雅三船本商船也現派迎淮軍並裝運礮械軍火往來南北殊少曠時此閩局諸船分派之情形也而滬船之到閩者現祇測海一船僅供閩滬遞通消息臺灣遠隔內地防務文書刻不容緩就眼前輪船

沈文肅公政書卷四

奏摺

六十八

計之實覺不敷周轉臣計現在廠中百五十四馬力之輪機水缸已成兩副所運外洋木料閩亦陸續歸來因未奉

諭旨不敢擅自興工工匠人等祇令製造備用器具并修理舊船若爲省費起見尙須酌量遣撤惟該工匠等學習多時造輪之法已皆諳悉聚之數年散之一旦不免另圖生計他日重新招募殊恐生疏而已便之水缸機器已購之木料將俱置諸無用之區實則暗中糜費似不如仍此成局接續興工在匠作等駕輕就熟當易告成而廠中多造一船卽愈精一船之功海防多得一船卽多收一船之效况由熟生巧由舊悟新卽鐵甲船之法亦可由此肇端購致者權操於人何如製造者權操諸已



除出洋學習一節仍候會議復奏請

旨遵行外合懇

天恩准將閩廠輪船續行興造以利海防臣等愚昧之見是否有當謹會同協辦大學士陝甘總督臣左宗棠附片陳明伏乞皇上聖鑒訓示遵行謹奏

沈文肅公政書卷四

奏摺

六十九

擬購挖土機船鐵脅新式輪機片

同治十三年十二月初一日

再船工現已續辦<sub>臣</sub>等查應亟購備者尙有三端一曰大挖土機船一曰船上鐵脅一曰新式輪機船廠江濱年來泥沙日淤雖用挖土機船設法開濬無如地寬器小旋挖旋積倘江流日淺新船下水無由廠地便因而廢聞外國有極大挖土機船計一點鐘可挖土五十方尺當人工一千餘擔之多果得此船刷除積淤廠地乃可無虞此挖土機船之購所以不容緩也船脅必需天然彎木內地無之向運諸暹羅仰光等處聞該處近來此木亦少所以西洋勗易鐵脅以濟其窮閩廠前者皆用木脅邇來十六號開工木脅大形竭蹶勉強湊集尙不敷一船之用

沈文肅公政書卷四

奏摺

七十

後繼尤難非亦改鐵脅不爲功惟此項工程本廠匠徒未曾素習不得不取式於外洋此鐵脅之購所以又不容緩也舊式輪機用煤過費外國近又勗新式臥機以爲兵船取其機器與水面平可以避礮也勗新式立機以爲商船取其機器所佔艙位無多可多裝客貨也煤較省而機較靈非各購一副而來俾匠徒仿造則巧拙懸殊造船之功亦難於精進此新式輪機之購所以又不容緩也惟此三項之費自定購以及保險包紮護送合攏計非二三十萬金不可使惜一時之勞費誤後日之遠圖因小失大又非良策<sub>臣</sub>等再四思維似難中輟合無仰懇

天恩俯准乘此防務已鬆飭日意格先赴廈門打電線出洋探

悉三項實價然後令其歸國先辦大挖土機船一隻迅駛來工  
以保廠地一面在法國定造鐵船脅全副帶匠一二人前來鬪  
合並教匠徒打造約限一年成功而歸一面往英國定造新式  
臥機立機各一副帶匠二三人前來合攏並教匠徒鑄造亦約  
限一年成功而歸鐵脅必取法國者以閩船皆法匠所造其尺  
寸乃符新機必取英國者以英船向稱堅緻其制度無弊也至  
議定製鐵甲船未知底細下手殊難亦擬今日意格順途細訪  
詳悉開單寄歸以便他日斟酌舉辦可否之處謹會同大學士  
陝甘總督臣左宗棠附片陳明伏乞

皇上聖鑒訓示遵行謹奏

沈文肅公政書卷四

奏摺

七十一

船政需費萬緊海關無款可撥請撥四成洋稅摺

光緒元年六月

日

奏爲船政需費萬緊海關六成無款可撥籲懇

天恩俯念事關自強大局准撥四成洋稅以濟燃眉恭摺瀝陳  
仰祈 聖鑒事竊臣於同治十三年八月初二日奉

上諭閩廠准續行興造得力兵船以資利用等因欽此遵卽分  
途趕辦木煤銅鐵等料加緊課工詎九月以後海關以六成入  
不敷出遂將船政月款停解經臣奏懇 飭部將閩海關續款  
改撥原定船政經費仍按月撥解並聲明短解之款於臺防經  
費項下暫行挪墊在案旋經部議請

沈文肅公政書卷四

奏摺

七十二

旨飭下福州將軍迅將輪船經費在六成項下按月如數撥解  
以顧要工上年短解二十餘萬亦卽隨時補解以清移撥之款  
奉

旨依議欽此臣伏讀之下感極涕零敢不黽勉圖功以上副

朝廷自強之至意乃每月函催三四次臣文煜極力挪湊閱時  
三箇月分爲四次僅解十萬兩三去年十月而止臣之奉

命巡臺也以船政本臣所辦故未設後路糧臺凡臺灣應由內  
地採購之件兌發之款卽以船政局員兼理近者臺防餉源日  
絀不特萬難再事挪墊而採購之件兌發之款必逐漸清償春  
季尙可向銀號錢莊籌措指茶季關款坐扣今則茶季最旺之

月失信於人人亦咸知船政此後無可指之款雖欲下失信而不可得而籌措之路絕矣八夏南風司令去年定辦各料絡繹到工此時雖欠解之四十萬兩源源而來亦僅足敷周轉斷不能稍有贏餘昨准臣文煜覆書閩海關歲徵銀約二百三十萬六成約銀百四十萬奉提京餉五十七萬

萬年吉地十萬應解部庫墊款十三萬有奇陝西出關餉運十萬福厦司稅辛俸十二萬部庫加平飯銀匯費撥補常稅支銷等項十三萬有奇此必不可緩者約銀百一十六萬所存僅二十四萬應勻撥輪船經費六十萬雷正縮餉二十四萬奉省捕盜餉二萬計不敷銀六十二萬卽使將二十四萬全數解歸船

沈文肅公政書卷四

奏摺

七十三

政亦所短甚鉅惟四成項下可餘四十萬原奉部文不准截留第船政要需斷難貽誤應請將所餘四成儘數撥抵不敷者仍由六成勻撥方有實濟函商會奏前來臣四顧茫然深虞決裂

臣卽不顧大局擅議停工而已定之料已用之工當刻日清償亦須鉅款况宵旰焦勞倦倦南顧而臣子只圖自便棄垂成之緒墮未竟之功清夜捫心何以上對君父惟有仰懇

天恩逾格俯念事關自強大局准將閩海關所餘四成洋稅儘數撥抵船費不足者再由六成勻撥俾符原數以濟要工明知不准截留四成部臣特爲海防護惜命脈第船政與海防相表裏若船政半途而廢則海防並無一簣之基不得不竭其狂

愚冒昧干瀆謹會同大學士一等伯陝甘總督臣左宗棠福州  
將軍臣文煜閩浙總督臣李鶴年福建巡撫臣王凱泰合詞恭  
摺馳陳伏乞

皇太后

皇上聖鑒訓示遵行不勝惶悚待命之至謹奏

沈文肅公政書卷四

奏摺

七十四

會籌船政替人候

旨盤交遵赴新任摺

光緒元年八月  
初八日

奏爲會籌船政替人候

旨盤交遵赴新任恭摺馳陳仰祈

聖鑒事竊

臣於本年八月

初一日承准軍機大臣密寄七月十四日奉

上諭臺郡事宜漸次就緒沈葆楨交代清楚卽行前赴新任籌

辦海防毋庸來京陛見等因欽此伏念

臣

以樗朽之質膺艱鉅

之投壘奉

恩綸自容無地瀝情上籲

慰勉有加尙冀瞻覲

天顏面申忱悃抑或

機宜密授得所遵循茲奉前因仰思

宵旰焦勞何敢更爲再三之瀆計惟有遵

旨速赴新任竭蹶襄事以待

朝廷徐擇賢能而區區下私所

沈文肅公政書卷四

奏摺

七十五

不能釋然者則以船政一端勑之甚難墮之甚易名則爲觀成

之有日實不過一簣之始基倘非精益求精恐前此數百萬

帑金盡歸虛擲得其人則恢之彌廣日進無疆失其人雖欲循

前軌而守成規有所不可得

臣

在臺時已與

臣

凱泰昕夕晤商

十餘次自七月二十一日奏報起程後二十二日開駛是晚寄

旋澎湖二十三日登岸查閱礮臺工程甫及七成修築尙均牢

固閱畢起旋二十四日到工將積牘稍事清釐二十七日到省

與

臣文煜

臣

鶴年晤商船政交代咸以爲無逾於前署廣東巡

撫現任福建按察司郭嵩燾者詢謀僉同與

臣

凱泰所見若合

符節郭嵩燾學問經濟十倍於

臣

人人知之而忠愛肫摯之忱

尤臣久所佩服日來虛已苦心以講求洋務所見益深惟船政責重繙繁且時有關涉中外事件必躬親諦審以威望坐鎮其閒臬司礙難兼顧合無仰懇

天恩逾格俯念船政關海防大局可否 准將郭嵩燾臬司開缺 賞給卿銜督理船政俾得專摺奏事以肅中外之觀聽而期呼應之靈通臣一面飭各廠員紳將現存物料敘造簡明清冊並將臣經手未完事件及採辦欠發款項逐一清查開具節略如奉

俞旨卽可以次點交愚昧之見深恐無當謹會同大學士陝甘總督臣左宗棠福州將軍臣文煜閩浙總督臣李鶴年福建巡

沈文肅公政書卷四

奏摺

七十六

撫臣王凱奏恭摺由驛六百里馳陳伏乞

皇太后

皇上聖鑒訓示不勝悼悚待命之至謹奏



船政需人甚急請

派重臣接辦摺

光緒元年八月十八日

奏爲船政需人甚急改請

欽派重臣接辦並懇

飭由海道

南來俾臣得以迅速盤交遵

旨赴任恭摺馳陳仰祈

聖鑒事竊

臣

於本月初八日業將船

政請

派郭嵩燾接辦緣由奏明在案初九日准大學士直隸

總督李鴻章密咨知郭嵩燾已奉出使英國之

命勢不能爲

船政中止而船政關係海防根柢斷不容不慎擇其人非無熟

悉工程結實可靠者然能恪守成法恐未能式廓前規且當經

費支絀動輒掣肘之時非有卓絕之才識老成之資望能於萬

難中出新意以經緯之者不足爲

國家鞏持久之基而收自

沈文肅公政書卷四

奏摺

七十七

強之效

臣

思維再四計惟有北洋幫辦大臣丁日昌果毅精明

不避嫌怨近日講求洋務罕出其右者可否仰懇

聖恩准派

丁日昌督辦船政該大臣必能恢此遠謨爲南北洋生色

臣因

陋就簡負疚於心者有年亦急待丁日昌之精思密慮補

臣之

闕至北洋幫辦原係鉅任然李鴻章莅事日久綱舉目張似可

無煩藉助且天津與福建離遠隔數千里而海道五六日可通

船政如得其人南北洋均藉以聯氣脈是於幫辦之任正相成

而不相妨近聞丁日昌因病思歸想水土異宜所致閩粵接壤

冷煖差同該大臣亦可藉是調攝其躬爲

國家更膺非常之

任冒昧之見是否有當謹會同大學士陝甘總督臣左宗棠福

州將軍臣文煜聞浙總督臣李鶴年福建巡撫臣王凱泰恭摺  
由輪船駛赴天津發驛六百里馳遞如蒙 俞允應請 飭下  
丁日昌卽坐遞摺輪船由海道來聞俾 得以迅速盤交卽赴  
新任伏乞

皇太后

皇上聖鑒訓示不勝惶悚待命之至謹奏

沈文肅公政書卷四

奏摺

七十八



船政欠款飭閩海補解足額以後六成洋稅先儘按月解

濟摺

光緒元年八月二十九日

奏爲船政欠款懇 恩飭閩海關查照部議補籌足額以後六成洋稅先儘船政按月解濟勿因他款挪動以固海防之基恭摺陳仰祈 聖鑒事竊 准戶部咨本部會同總理衙門議覆船廠經費不敷請撥用四成洋稅一摺奉

旨依議欽此查原奏以製造輪船與海防相爲維繫既據該大臣稱用款艱難應卽准如所請將四成項下餘銀四十萬兩儘數撥歸船政將七月以後續徵四成洋稅提撥四十萬兩解還部庫以清界限嗣後船政經費仍遵原定章程由閩海關六成

沈文肅公政書卷四

奏摺

七十九

項下每月撥解銀五萬兩以符奏案等因旋准福州將軍臣文煜咨稱七月以前存銀堪以查照部案撥解輪船經費者僅只十五萬兩並卽隨文咨解前來伏念船政月款自去年九月停解今年四月以後陸續彌補二十萬兩僅敷去年十二月而止茲遵撥四成十五萬兩亦僅敷今年三月而止而船政懸款如日意格采辦之鐵脅全副新式輪機兩副挖土大機船一號半價十餘萬元南洋采辦木料未到者又十餘萬元挪用巡臺經費逐月補還外尙十餘萬兩如果部撥六月以前四成之四十萬兩儘歸船政閩海關固當遵照部議提七月以後四成四十萬兩補解部庫今六月以前存銀僅十五萬兩則是舊存之二

十五萬兩業經先期解部自當提七月以後之四十萬兩以十五萬兩補解部庫而以二十五萬兩交還船政方與部議相符而船政自本年五月至八月款項始有著落大局不致決裂其九月以後既照原定章程於六成項下每月撥解五萬兩應懇飭下閩海關先儘船政籌解所餘再撥京協各餉庶幾月款不至子虛接辦者方得所藉手臣交卸在卽而曉曉不已於君父之前者誠以海防始基不容中廢按月有款而後可次第責其成功區區下私是否有當謹會同大學士陝甘總督臣左宗棠福州將軍臣文煜閩浙總督臣李鶴年福建巡撫臣王凱泰恭摺附輪船至滬發驛六百里馳陳伏乞

沈文肅公政書卷四

奏摺

八十

皇太后

皇上聖鑒訓示不勝戰慄屏營之至謹奏

報赴新任起程日期摺

光緒元年九月

奏爲遵

旨卽赴新任恭摺馳報起程日期仰祈 聖鑒事竊臣承准軍機大臣字寄光緒元年九月初二日奉

上諭船政事宜沈葆楨卽交李鶴年等暫行兼顧督率道員吳仲翔一手經理俟丁日昌到閩後再行交代並著沈葆楨卽起程前赴兩江新任等因欽此仰見

聖主慎重海防之至意循誦再四感悚交并伏念船政經費萬難經臣疊次縷陳在案吳仲翔工程熟悉廉正樸誠任怨任勞此臣所素信者倘費無所出課虛責有不特非一道員所能爲

沈文肅公政書卷四

奏摺

八十一

力卽丁日昌到閩後亦斷不能以空拳赤手從事其閒兩江責重事繁 宵旰憂勤惓惓南顧臣何敢藉船政籌款爲口實稍事遷延惟是事關自強中外屬耳目焉若半途而廢則大局全隳伏懇

天恩飭下將軍督撫臣設法支持視如家事舊欠者彌補足額按月者解濟如期俾丁日昌得以展其所長補臣積年固陋之愆曷勝幸甚臣擬於十月初一日乘輪船由海道八江遵

旨赴任合將起程日期由驛五百里馳報以冀上慰 慈廑伏

乞

皇太后

皇上聖鑒訓示謹奏

沈文肅公政書卷四

奏摺

八十二



沈文肅公政書卷四

